

## Юст поселк сӓӓхрджӓнӓ

Юст—совхозин централън поселк. Нидн болн эн джил Юст поселкд кесг халъмг ӓрк-бӓл нуӓдж ирцхӓв. Эднд хошад ӓрк-бӓл бӓӓх 10 гер, гурвад ӓрк-бӓл бӓӓх хойргер, бичкдӓдин ясль, бань, магазин тосхгдв.

Ода эн поселкд долан джилӓ школ, больниц, клуб, радио-узел, бичкдӓдин ясль болн нань чигн учрежденьс бӓӓнӓ. Поселкд ӓмтн немгддж ирсн деерӓс шидрӓс нег ӓмтӓхн уста худг малтдж кегдджӓнӓ. Нидн суулгӓсн модд цугтан ӓмлдж ургъджана.

Юст поселкд бӓӓх улс бийдӓн гермӓд тосхдж авхар седджӓнӓ, зуг модн, хадасн, шир, шифр, нань чигн тосхлтин материал магазинд уга болсн учрар, гермӓд тосхгдджахмн уга.

Эн джил долан джилӓ школ, больниц, бичкдӓдин ясль, клуб ясгдх зӓвтӓ. Болв тосхлтин материал уга болад ясгдджахмн уга. Тегӓл цуг кергтӓ тоот материалар кӓцднь тетктхӓ гиж Юстинск района потреб-союзас сурджанавдн.